



LAPORAN LIPUTAN MEDIA

ISNIN / 11 SEPTEMBER 2023

- 1. NASI BUNGKUS DI KELANTAN NAIK HARGA – SINAR HARIAN**
- 2. PENGELUAR BERAS TEMPATAN PERLU BANTUAN KERAJAAN – BERITA HARIAN**
- 3. NAK TAK NAK KENA JUGA BELI! – HARIAN METRO**
- 4. PERKEMAS DULU SISTEM PENGAIRAN – UTUSAN MALAYSIA**
- 5. SAWAH SELANGOR BERPOTENSI KERANA TERATUR, SISTEMATIK – UTUSAN MALAYSIA**

DISEDIAKAN OLEH:

CAWANGAN KOMUNIKASI KORPORAT (MADA)

KERATAN AKHBAR : SINAR HARIAN
TARIKH : 11 SEPTEMBER 2023
PERKARA : ISU SEMASA

Nasi bungkus di Kelantan naik harga

Ekoran kenaikan harga beras import dan barang mentah lain

Oleh HAZELEN LIANA KAMARUDIN
KOTA BHARU

Nasi bungkus di negeri ini naik sebanyak 50 sen susulan peningkatan harga beras import termasuk Siam dan kesukaran mendapat beras tempatan yang sedang berlaku ketika ini.

Tinjauan *Sinar Harian* pada Ahad mendapati rata-rata peniaga terpaksa berbuat demikian selepas tidak lagi mampu untuk menanggung kenaikan harga beras termasuklah bahan mentah.

Seorang peniaga nasi berlauk di Kampung Pek, Machang, Ilya Zakaria, 60, berkata, dia terpaksa menaikkan harga sebanyak 50 sen untuk setiap bungkus.

"Sebelum ini saya jual nasi berlauk untuk sarapan pagi dengan harga RM3.50 sebungkus, namun sekarang RM4.

"Walaupun berat hati nak berbuat demikian, namun saya tidak mempunyai pilihan kerana kenaikan harga beras amat memberikan kesan," katanya yang menjual nasi putih bersama lauk seperti ayam gulai, goreng, masak merah, serta ikan gulai dan disertakan dengan timun bersama sambal.

Menurut Ilya, dia terpaksa menggunakan beras import bagi memastikan nasi



Hasnah mengakui kenaikan sebanyak 50 sen itu sudah tidak dapat dielakkan lagi ekoran harga beras Siam yang semakin meningkat.



ILYA ZAKARIA

ROHANA

yang dimasak berada dalam keadaan baik. Tambahnya, kebanyakan pelanggan memahami situasi tersebut dan tidak merungut.

Sementara itu, peniaga nasi bungkus

tengah hari di Selising, Pasir Puteh, Hasnah Abdul Rahman, 50, berkata, kenaikan harga sebanyak 50 sen itu sudah tidak dapat dielakkan lagi.

Jelasnya, selain harga beras, peningkatan kos bahan mentah seperti ikan, ayam, sayuran, minyak masak dan lain-lain menyebabkan peniaga sepertinya turut terkesan.

"Sebelum ini saya jual nasi kosong bersama aneka jenis lauk pauk seperti ayam, ikan, daging goreng yang disertakan bersama timun dan sambal sekitar RM5.50 sebungkus, namun terpaksa dinaikan kepada RM6.

"Beras Siam merupakan bahan utama kerana nasi tidak mudah patah dan lembik. Lagipun pelanggan sudah selesai dengan beras Siam, jika ditukar beras lain

mereka merungut," katanya.

Hasnah memberitahu, ketika ini beras Siam dijual pada harga RM105 bagi 25 kilogram bergantung kepada cap.

Tambahnya, kenaikan harga beras Siam yang tidak menentu itu menyebabkan dia terpaksa mengeluarkan modal lebih.

Beliau berkata, itu belum lagi melibatkan harga ikan, ayam serta sayuran yang sentiasa tidak menentu.

"Kadangkala murah dan mahal. Semua itu kami perlu tanggung," katanya.

Seorang lagi peniaga, Rohana Daud di Labok, Machang, 53, turut mengakui terkesan dengan kenaikan harga beras.

Dia bergantung sepenuhnya kepada beras import dari Thailand untuk memastikan jualan laris kerana penduduk di negeri ini amat menggemari beras Siam.

"Ketika ini harga nasi berlauk di kedai saya dijual pada harga RM3 hingga RM4 bergantung kepada lauk.

"Kami menjual nasi kosong bersama aneka jenis lauk seperti ayam, ikan, daging bersama timun dan sambal," ujarnya.

Sementara itu, Pengerusi Yayasan Pengguna Malaysia Cawangan Kelantan, Kameruzaman Ab Rahman ketika mengulas perkara itu berkata, kerajaan perlu mengambil tindakan segera untuk menyelesaikan harga beras dengan secepat mungkin bagi memastikan rakyat termasuk para peniaga tidak terus berdepan tekanan.

Menurutnya, pada masa sama pengguna perlu bijak dalam berbelanja bagi mengelakkan mereka terus terbeban.

Sinar Harian sebelum ini melaporkan kenaikan harga beras Siam adalah disebabkan kejatuhan nilai ringgit di pasaran.

KERATAN AKHBAR : BERITA HARIAN

TARIKH : 11 SEPTEMBER 2023

PERKARA : ISU SEMASA

Pengeluar beras tempatan perlu bantuan kerajaan

DAN 2.0 perlu diperjelas dalam usaha bantu golongan B40

Oleh Mahanum Abdul Aziz
mahanum_aziz@bh.com.my

Isu kenaikan harga beras import adalah serius jika tidak ditangani dengan baik kerana boleh mengakibatkan harga beras secara keseluruhan meningkat, sekali gus melonjakkan secara menyeluruh kos sara hidup rakyat terutama golongan B40 dan rentan, demikian menurut penganalisis.

Pensyarah Kanan, Pusat Pengajian Ekonomi, Kewangan dan Perbankan (SEFB), Universiti Utara Malaysia (UUM), Prof Madya Dr Irwan Shah Zainal Abidin, berkata kenaikan harga beras import akan meningkatkan kos sara hidup rakyat, walaupun data inflasi sudah berkurangan.

Sehubungan itu, katanya kerajaan perlu memperjelaskan langkah yang dilakukan untuk mengatasi masalah asas sedemikian seperti yang terkandung dalam Dasar Agromakanan Negara 2021-2030 (DAN 2.0) serta Belanjawan 2023, selain usaha untuk menghapuskan monopoli BERNAS, permit import dan sebagainya.

"Saya lihat ada banyak strategi diletakkan dalam Belanjawan

2023 yang dibentangkan pada Februari lalu berkenaan isu ini seperti merombak sektor agromakanan melalui automasi dan pendigitalan, penyediaan dana di bawah pelbagai skim bernilai berbilion ringgit, pemberian elaun modal, galakan cukai dan juga menggalakkan sektor swasta membabitkan diri dalam pengeluaran makanan berskala besar dan berdaya saing.

"Begitu juga penyediaan RM30 juta untuk projek agromakanan antara Kerajaan Persekutuan dengan kerajaan negeri. Nyatakan status terkini semua tindakan yang berbentuk jangka pendek dan sederhana ini," katanya kepada BH.

Irwan Shah berkata, bagi tindakan jangka panjang pula, DAN 2.0 sudah meletakkan strategi dan hala tuju untuk mengatasi masalah itu seperti yang terkandung dalam enam objektif, lima teras, 21 strategi dan 77 pelan tindakan.

"Semua ini, jika dilaksanakan dengan baik, dilengkapkan dengan pelaksanaan langkah

dalam Belanjawan 2023 yang mantap, saya yakin isu ini dapat diatasi secara tuntas dan menyeluruh," katanya.

Pengeluar perlu kompetitif

Profesor Adjung Tun Ahmad Sarji School of Government and Public Services (TASSGPS) Universiti Tun Abdul Razak (UNIRAZAK), Dr Zulkipli Omar, berkata bagi jangka pendek, kerajaan perlu mempertingkatkan pemantauan dan memastikan keberkesannya.

Beliau berkata, peningkatan permintaan untuk beras tempatan adalah matlamat akhir jangka panjang bagi memastikan pengusaha tempatan kekal relevan, namun dasar lain untuk meningkatkan pengeluaran tempatan perlu diberi penekanan.

"Pokoknya, pengeluar beras tempatan perlu dipastikan kekal kompetitif supaya mereka boleh bersaing dengan beras import dan pada masa yang sama memastikan harga beras di pasaran kekal berpatutan.

"Pengeluar beras tempatan pula perlukan bantuan kerajaan. Pendeknya, fokus dasar kerajaan perlu ditumpukan kepada sudut penawaran atau pengeluaran, bukan semata-mata dari sudut pengguna sahaja," katanya.

Sementara itu, Ketua Ahli Ekonomi dan Kewangan Sosial Bank Muamalat Malaysia Bhd, Dr Mohd Afzanizam Abdul Rashid, berkata kenaikan harga beras import membuka peluang kepada golongan yang tidak bertanggungjawab yang mahu mengambil kesempatan.

Beliau berkata, beras adalah makanan ruji rakyat tempatan serta buruh asing, justeru, permintaannya akan kekal tinggi dan ia tidak anjal kepada perubahan harga disebabkan rutin rakyat dan buruh asing yang mahukan beras sebagai diet harian mereka.

Jelasnya, perkara itu mewujudkan peluang bagi mereka yang mahukan keuntungan besar dan cepat dengan cara tidak bertanggungjawab seperti memanipulasi harga serta perbuatan sorok.

"Justeru, tahap penguatkuasaan undang-undang adalah penting bagi membanteras kegiatan jenayah ini. Kenaikan harga barang asas sudah pasti akan menjejaskan kuasa beli rakyat terutama golongan berpendapatan rendah.

"Di samping itu, ia akan menjejaskan sentimen pengguna dan rakyat yang boleh menjejaskan momentum pertumbuhan perbelanjaan swasta," katanya.

Pengeluar beras tempatan pula perlukan bantuan kerajaan. Pendeknya, fokus dasar kerajaan perlu ditumpukan kepada sudut penawaran atau pengeluaran, bukan semata-mata dari sudut pengguna sahaja

Zulkipli Omar,
Profesor Adjung Tun Ahmad Sarji School
of Government and Public Services
(TASSGPS) UNIRAZAK



KERATAN AKHBAR : HARIAN METRO

TARIKH : 11 SEPTEMBER 2023

PERKARA : ISU SEMASA

Nak tak nak kena juga beli!

Pelanggan terpaksa beli beras import walaupun harga tinggi kerana kekurangan bekalan BPT

Oleh Sudirman Mohd Tahir
sudirman@
hmetro.com.my

Kuala Lumpur

Kekurangan bekalan beras putih tempatan (BPT) di pasaran terus membelenggu orang ramai termasuk peniaga sehingga membuatkan mereka tiada pilihan dan terpaksa membeli beras putih import.

Tinjauan Harian Metro di beberapa pasar raya termasuk pusat beli-belah mendapati hanya beras putih import boleh diperolehi di premis terbabit.

Pekerja sebuah pasar raya yang enggan dikenali, berkata bekalan beras BPT mula terputus sejak dua minggu lalu, malah, beras putih import yang dijual turut mengalami kenaikan harga hingga RM8.

"Permintaan beras putih tempatan memang tinggi sebab harga murah. Tapi, sudah dua ke tiga bulan tidak ada stok. Ramai pelanggan cari, tapi nak buat macam mana bekalan tidak ada," katanya.

Sementara itu, seorang pengguna yang ingin dikenali sebagai Fatimah, 28,

berkata dia terpaksa membeli beras putih import walaupun harganya tinggi.

"Sebelum ini saya sekeluarga memang makan beras tempatan. Sebab ada pelbagai jenis dan pilihan, selain harga yang jauh lebih murah.

"Namun, sejak ketiadaan beras tempatan, nak tak nak kena juga beli beras import. Memang terasa jugalah kenaikan (harga) itu. Tapi nak buat macam mana, kalau tak beli beras, tak makanlah.

"Apa pun, saya berharap masalah ini dapat diatasi dengan segera. Saya percaya bukan saya saja yang berdepan situasi ini, tapi ramai lagi," katanya.

Pekerja syarikat swasta, Najaa Jefri, 30, berkata kesukaran mendapatkan beras BPT menyebabkan dia bersama suami berusaha mencari di merata tempat.

"Diakui, sekarang ini memang susah sangat nak dapat beras putih tempatan. Kadang masuk dua tiga kedai dan pasar raya

Penduduk mengeluh

Johor Bahru: Penduduk di sekitar bandar raya ini dan Kota Tinggi mengeluh apabila mendakwa mereka semakin sukar mendapatkan bekalan beras tempatan dan gula sejak awal minggu lalu.

Tinjauan di Kota Tinggi mendapati ada penduduk mendakwa mereka terpaksa menjelajah ke beberapa kawasan bagi mencari kedai runcit yang menjual beras tempatan.

Seorang penduduk di Taman Saujana di Kota Tinggi, Masturah Suradi, 34, berkata dia terpaksa ke beberapa kedai runcit untuk mendapatkan bekalan beras tempatan bagi kegunaan harian keluarganya. "Saya mendapati bekalan beras import memang berlabak, tetapi sukar mendapatkan bekalan beras tempatan yang harganya lebih terkawal," katanya.

Sementara itu, seorang usahawan, Jamil Hussein, 54, berkata dia mendapati bekalan gula di sebuah pasar raya di Kota Tinggi juga kehabisan stok.



TINJAUAN Harian Metro di beberapa pasar raya termasuk pusat beli-belah mendapati hanya beras putih import boleh diperolehi.

pun belum tentu ada. Pusinglah merata tempat setiap hari. Kalau jumpa dah kira bernasib baik. Memang akan beli dalam kuantiti banyak.

"Bukan tak nak beli beras import, tapi harga mahal. Kami sekeluarga banyak komitmen lain. Jadi, mana yang boleh jimat,

kami jimat," katanya.

Terdahulu, Kementerian Pertanian dan Keterjaminan Makanan (KPKM) memberi jaminan bekalan beras BPT di seluruh negara dijangka pulih dalam tempoh sebulan susulan langkah intervensi segera yang sedang dilaksanakan kerajaan.

Pada 2 September lalu, pengilang padi dan pemborong beras negara dilaporkan diminta untuk meningkatkan bekalan BPT sebanyak 20 peratus menerusi Program Khas Beras Putih Tempatan, sebagai langkah intervensi memulihkan bekalan itu di pasaran.

KERATAN AKHBAR : UTUSAN MALAYSIA

TARIKH : 11 SEPTEMBER 2023

PERKARA : ISU SEMASA

Perkemas dahulu sistem pengairan

ARAU: Masalah infrastruktur khususnya berkaitan sistem pengairan perlu diperkemas terlebih dahulu sebelum usaha ke arah penanaman padi lima kali dalam tempoh dua tahun dilaksanakan di negeri ini.

Meskipun kaedah tersebut dilihat mampu meningkatkan produktiviti penanaman padi selain mampu meningkatkan hasil beras negara sekali gus mengurangkan kebergantungan import beras, beberapa aspek asas itu perlu diselesaikan terlebih dahulu khususnya di kebanyakan kawasan negeri ini.

Hal demikian kerana masalah sistem pengairan di kebanyakan kawasan penanaman padi di negeri ini masih dalam keadaan tidak teratur sekali gus menyukarkan para pesawah dalam mengikut jadual penanaman dengan sebaik-sebaiknya selain berdepan masalah atau kesan apabila musim menuai.

Bercakap kepada *Utusan Malaysia*, Pengerusi Suara Tani Malaysia, Mohd. Shazwan Suban berkata, jika sistem pengairan baik tanaman padi lima kali dalam tempoh dua tahun itu boleh dilaksanakan.

Dalam masa sama, katanya, hasil kebanyakan pesawah pula hanya sekitar empat ke tujuh tan metrik perhektar itu pun sangat-sangat sukar untuk diperolehi.

"Kalau hendak laksanakan juga (penanaman padi lima kali dua tahun) soal infrastruktur kena eloklah. Ini peruntukan untuk bersihkan parit atau sungai yang menyalurkan air keluar masuk daripada sawah

juga semakin berkurangan daripada empat kepada dua kali setahun.

"Pelaksanaan penanaman padi lima kali dalam tempoh dua tahun memerlukan perediaan rapi khususnya dalam aspek sistem pengairan yang kemas, penglibatan pesawah serta kajian berkaitan tanah supaya tidak menimbulkan masalah kelak," katanya.

Kelmarin *Mingguan Malaysia* melaporkan, ketika dunia berdepan kenaikan harga beras tertinggi dalam tempoh 15 tahun, rakyat boleh menarik nafas lega apabila usaha kerajaan meningkatkan pengeluaran padi melalui sistem penanaman lima kali dalam tempoh dua tahun membuahkan hasil.

Projek perintis yang dilaksanakan di Perlis dan Kedah bukan sahaja berjaya menambah pusingan penanaman padi tetapi juga dapat meningkatkan hasil bagi setiap hektar daripada sekitar empat hingga lima tan sehektar sebelum ini kepada kira-kira 10 tan sehektar.

Sebagai rekod, keluasan kawasan tanaman padi di seluruh negeri ini ialah 29,200,72 hektar membabitkan 19,034,53 di kawasan Lembaga Kemajuan Pertanian Muda (MADA) dan 10,166,16 hektar di luar kawasan MADA dengan keseluruhan pesawah 17,930 orang.

Sementara itu, seorang pesawah, Mohd Noor Hashim, 60, berkata, penanaman padi banyak bergantung kepada sistem pengairan yang baik.

Katanya, pada masa ini, penanaman padi setahun dua kali juga agak sukar apatah lagi lima kali dalam tempoh dua tahun.



BEBERAPA pesawah melihat hasil padi dipindahkan daripada mesin ke lori sebelum dibawa ke pusat jualan padi di Kampung Alor Redis, Arau, Perlis semalam. - UTUSAN/IZLIZAN OTHMAN

KERATAN AKHBAR : UTUSAN MALAYSIA

TARIKH : 11 SEPTEMBER 2023

PERKARA : ISU SEMASA



GILIRAN PENANAMAN DAN PENUAIAN PADI SELANGOR

KAWASAN	MUSIM PERTAMA		MUSIM KEDUA	
	TANAM	TUAI	TANAM	TUAI
Tanjong Karang Sawah Sempadan Sungai Burong	Januari	April	Julai	Oktober
Sekinchan Sungai Leman	Februari	Mei	Ogos	November
Pasir Panjang Sungai Nipah	Mac	Jun	September	Disember
Sungai Besar Panchang Bedena Bagan Terap Sungai Panjang	April	Julai	Oktober	Januari

Sawah Selangor berpotensi kerana teratur, sistematik

Oleh MOHAMAD ATHIR ISMAIL
athir.ismail@mediamula.com.my

SABAK BERNAM: Pengeluaran padi di Selangor mencapai tahap tertinggi bagi setiap hektar iaitu sekitar enam hingga 10 tan metrik sehektar berbanding negeri lain berikutan mempunyai sawah yang teratur dan bersistematik.

Menurut seorang pengusaha tanaman ruji itu di Sungai Besar, Mokhtar Talha, 59, kesemua pesawah di kawasan Barat Laut Selangor mematuhi sistem penanaman padi sejak 1960-an lagi apabila kaedah dua musim diperkenalkan.

"Memang diakui teratur dan ada disiplinnya yang semua pesawah kena patuhi. Sebagai contoh, masa ditetapkan untuk tanaman padi mengikut kawasan yang dipecahkan kepada empat bahagian iaitu di Tanjong Karang, Sekinchan, Pasir Panjang dan Sungai Besar.

"Setiap pesawah perlu mematuhi peraturan yang dibuat berdasarkan sistem giliran pengairan bermula dari Tanjong Karang hinggalah ke Sungai Besar melalui sumber air dari Sungai Tenggi memasuki saluran dipanggil sebagai 'palong'," katanya ketika ditemui *Utusan Malaysia*.

Mokhtar berkata, palong adalah satu-satunya sistem pengairan dalam negara ini yang terdapat di Selangor.

Ini kerana ia dibina lebih 50

“Memang diakui teratur dan ada disiplinnya yang semua pesawah kena patuhi. Sebagai contoh, masa ditetapkan untuk tanaman padi mengikut kawasan.”

tahun dahulu dengan menggunakan konkrit dan kedudukannya lebih tinggi di atas tanah.

"Palong terdapat di setiap blok-blok kawasan sawah padi di negeri ini yang akan membekalkan air ke dalam sawah padi apabila tiba musimnya. Tujuan penggunaan palong adalah mengawal sumber air dan memastikan keseluruhan bekalannya sentiasa mencukupi.

"Pengaliran air akan bermula di Tanjong Karang kerana kawasan tersebut adalah yang pertama sekali akan menanam padi, ketika pesawah di sana mula menanam padi, di Sungai Besar pula kami sedang menuai, maka palong di sini kering, tak ada air kerana disalurkan di sana, begitu juga sebaliknya," jelasnya.

Berdasarkan maklumat menerusi laman Kawasan Pem-

angunan Pertanian Bersepadu (IADA) Barat Laut Selangor, sistem saliran terkawal itu dibina oleh Jabatan Pengairan dan Saliran (JPS) yang dahulu dikenali sebagai Jabatan Parit dan Taliair (JPT) pada 1932.

Kemudian pembangunan saluran air di sana diteruskan pada 1948 oleh jabatan sama termasuk pembinaan Ibu Empangan Sungai Bernam.

Pembangunannya kemudian diteruskan lagi dan pada 1962, tanaman padi dua kali setahun diperkenalkan dan pada masa sama rumah pam di Bagan Terap dibina bagi memenuhi keperluan air.

Dalam pada itu, seorang lagi pesawah, Rahmat Basri, 56, memberitahu, selain sistem giliran pengairan menerusi palong, sawah-sawah di Selangor turut melalui proses penuaian menggunakan jentera berturutan.

"Itu mungkin langkah yang jimat dan mengurangkan kos pembelian jentera. Maksudnya tak perlu ada jentera mesin penuai yang banyak, apabila melalui giliran, kawasan mana perlu dituai akan menggunakannya terlebih dahulu.

"Sungai Besar adalah kawasan yang terakhir, jadi selepas tempat lain selesai menuai, pesawah di sini pula akan mendapatkan khidmat jentera daripada Pertubuhan Peladang Kawasan (PPK) untuk menuai dan mengangkut padi serta jerami," ujarnya.